



Gadaa Journal/Barrulee Gadaa

Volume 5, No.2, June 2022
<https://journals.ju.edu.et>

e-ISSN: 2616-3985
p-ISSN: 2616-3977

A Bilingual Journal of the Institute of Oromo Studies
(IOS) Jimma University

Full Length Research Paper

Qaaccessa Caasaa Weedduu Oromoo Yoomessa Tika Loonii: Akka Aanaa Jalduutti

Mangistuu Tulluu (PhD)¹*fi Guutuu Damee²

¹Yuuuniversiitii Amboo ²; Yuuniversiitii Salaalee

Iimeelii- taddimange@gmail.com

Submission Date: August 25, 2021

Acceptance Date: April 02, 2022

Axareeraa

Qorannoon kun Qaaccessa Caasaa Weedduu Oromoo Yoomessa Tika Loonii aanaa Jalduurratti xiyyeffata. Kaayyoon ijoo qorannichaas caasaa walaloo weedduu yoomessa tika looniikan akka Aanaa jalduutti beekkaman funaanuun qaaccessuudha. Kaayyoo kana milkeessuuf ammoo walaloon weedduu yoomessa tika loonii hawaasa Oromoo aanaa Jalduurraa mala iddatteessuu akkaayyoofi darbaa dabarsaatiin foo"aman irraa funaanameera. Odeeffannoo kanas malleen funaansa ragaa af-gaaffii gamisaan caaseffamaafi marii garee xiyyeffataatiin funaanamuun caasaa isaanitiin qoqqoodamuun mala xiinxala ragaa akkamtaatiin xiinxalamaniiru. Adeemsa xiinxala ragaa keessatti yaadiddama caasessamaatti dhimma bahuun caasaan walalooweedduu yoomessa tikalonii xiinxalameera. Bu"uuruma kanaan walaloon weedduu yoomessa tikalonii tokko bo"oowwan afurirraa kan ijaaramu ta"uu, bo"oowwan tokkoffaafi sadaffaan baay"ina birsagootaan yommuu walgitan bo"oowwan lammaffaafi arsaffaan baay"ina birsagaatiin kan wal gitan ta"uun hubatameera. Yeroo ammaa weedduun yoomessa tikalonii hawaasa Oromoo aanaa Jalduu biratti laafuufi sadarkaa dagatamuurra gahuunsa bira gahameera. Laafuufi dagatamuu weedduu yoomessa tika loonitiif sababni dhiibbaa amantii, siyaasaa, ammayyummaa, teekinoolojiifi dhiphachuu lafa margaa ta"uu argannoon qorannichaa ni mul"isa. Argannoowwan armaan oliitiif, yaadni furmaataas kaa"ameera.

Jechoota Ijoo: Caasaa, weedduu, tiksee loonii, xiinxala

* Corresponding author

Abstract

This research focused on the Structural Analysis of the Oromo cattle herding songs in the Jalduu district. The main purpose of the research was to collect and analyze the poetic structure of the cattle-herding songs known in the Jalduu District. The sample of the study was selected through purposive and snowball sampling techniques. The data were collected through semi-structured interviews and focus group discussions and analyzed qualitatively. The cattle-herding songs of Oromoo are composed of four stanzas. The first and third stanzas are equal in the number of verses while the second and fourth stanzas are equal in the number of stanzas to be understood and to be equivalent. Currently, the Oromoo Song of herding cattle in the Jalduu district is weakened and forgotten among the Oromoo community in the district. The findings of the study show that the reasons for the weakness and forgetfulness of cattle herding songs are religion, politics, 'modernism', technology, and the lack of grassland pressures. As a possible solution incorporating the songs into the curriculum, promoting songs using different media, conducting further in-depth research from different perspectives, and using those songs as documentary background music are recommended.

Key Terms: Structure, song, cattle-herder, analysis

1. Seensa

(Berhanu, 2013); (Finnegan, 1992); (Dorsan, 1972)fi (Bukenya, 1994)n akka jedhanitti, og-afaan ogummaa afaanii kan hawaasni dhimma addaa addaa ittiin ibsachuuf dhimma itti bahu, kan afaaniin qindaa“uifi afaanumaan dhalootarraa gara dhalootaattii daddarbaa jiraatuudha. Akkasumas, (ሰለ ታምህር, 2007) og-afaan ogummaa yaada yeroo dheeraaf sammuu namootaa keessa ture himuun, seenessuun, sirbuun namoota biroo yaadachiisaa kan daddarbu ta“uusaa kaasa. Yaada hayyoota kanarraa wanti hubatamu, og-afaan ogummaa afaaniin qindaa“u kan afaanumaan deebi“ee hawaasaaf dhihaatuufi haaluma jirenya hawaasichaarraa maddu ta“usaati.

Af-walaloonis damee ogafaanii haalli jiruuf jirenya ummataa keessatti ilaalamuudha. Yaada kana deeggaruun, (Jeylan, 2005) Af-walaloon haala jirenya hawaasaa keessaa waan madduuf akkaataa jirenya hawaasa kan ibsuufi miira keessoo hawaasichaa kan calaqqisiisudha jedha. Gabaabumatti, af-walaloon kuusaa muuxannoofi muudannoo hawaasaa ta“ee, akkaataa miira keessoo namaa ibsuun kan qindaa“uifi dhalootarraa dhalootatti afaaniin daddarbuudha.

Oromoone akkuma hawaasa biroo dhimmoota bu“aa ba“ii jirenyasaa keessatti isa muudataniifi beekumsa muudannoo kanarraa kuufate awfalaloodhaan waliif qooda. Af-walaloowwan ummata Oromootiin yeroo garaagaraatti kalaqaman kunis, haala jiruufi jirenya hawaasichaa ibsuurra darbanii guddina muuziqaa ammayyaatiif gumaachaniiru.Yaaduma kana deeggaruun (Figre, 2008) ummanni Oromoo sirbaa fi shubbisoota mimmiidhagoo miira namaa hawwatan kalaquufi taphachuun guddina muuziqaa Itiyoophiyaa har“aatif tumsuu isaanii ibseera.

Af-walaloon weeduuyoomessa tika looniis gosoota af-walaloo dhimmoota garaagaraatiif oolan keessaa tokko ta“uu(ሰለ ታምህር, 2007) ibseera. Af-walaloon weeduu weeduu yoomessa tika loonii gosoota af-walaloo Afaan Oromoo keessaa tokko ta“ee kan namoonni hojii tika looniirratti bobba“an weeddisan ta“uu, (Tadesse, 2016) barreesseera. Oromoone dhimmoota

jirenyaa isaa weedduu tiksee loonitti dhimma bahuun kan ibsatwaan ta“eef weedduun kun hawaasa Oromoo aanaa Jalduu biratti beekamaadha. Haa ta“u malee hanga qorattooni kun sakatta“anitti caasaa weedduu yoomessa tika loonii aanaa jalduurraati qorannoon adeemsifame hin argamne. Haalli weedduun tiksee yeroo amma keessa jiruufi hireen weedduu tiksee kan gara fuulduraa xiinxalamee hin kaa“amne. Weedduun kun dhaloota itti aanee dhufutti darbuu kan danda“ummoo, yoo qoratamee barreeffamee kaa“ameedha. Kanuma bu“uureffachuudhaan qorannoon kuncaasaa af-walaloo weedduu yoomessa tika loonii gadi fageenyaan xiinxaluun beekumsa hawaasaa gama kanaan dhokatee ture ifatti baasuuf adeemsifame.

Kaayyoon bu“uraa qoranno kanaa, caasaa afwalaloo weedduu yoomessa tika loonii Oromoo aanaa Jalduu xiinxaluu yommuu ta“u, kaayyoleen gooree qoranno kanaamoo walaloo weedduu yoomessa tika loonii qaaccessuu, haala weedduun yoomessa tika loonii yeroo amma irra jiru ibsuufi hiree weedduu yoomessa tika loonii kan gara fuulduraa xiinxaluudha.

2. Sakatta'a Barruulee

Yaadiddama Caasessamaa (Structuralism)

Yaadiddamni Caasessamaa bu“aa hojii hayyuu Ferdinand de Saussure yommuu ta“u, yaada bu“uraa lama qaba. Isaanis bakka bu“aafi bakka bu“amaa yommuu ta“an, bakka bu“aarratti xiyyeffachuuun caasaa caasaatti caccabsuun beekumsa qorachuun akka danda“amu agarsiisa. Akka yaada yaadiddama Caasessamaatti, afwalaloo caasaa caasaatti caccabsuun qorachuun akka danda“amu (Finnegan, 1970) ibsiteetti. Adeemsi caasessitootaa wanta hundumaa garee garetti caccabsuun seera ittiin xiinxalamanaan kaa“uu akka ta“e (Dundes, 1976) ibseera. Akkuma xiyyeffannoonaan yaadiddama caasessamaa af-walaloo caasatti qoqooduu ta“e, qoranno kana keessattis caasaan afwalaloo weedduu yoomessa tika loonii bu“ura yaadiddama caasessamaatiin caasaalee xixiqqotti caccabuun xiinxalamaniiru. Akka yaada yaadiddama caasessamaatti afwalaloo yommuu xiinxallu hiika caasaan sun dabarsuun osoo hintaane akkaataa caasaan afwalaloo sun hiika sana ittiin dabarsuf itti ijaaramerratti xiyyeffachuu qabna. Yaaduma kana kan dhugoomsu (Tyson, 2006) yaadiddamni caasessamaa ergaa caasaa foorkoorii osoo hin taanee akkaataa caasaaleen sun waliin hiriiranii ergaa sana itti dabarsan kan xiinxalu ta“uu kaasa. Akkaataa caasaaleen sun ergaa sana ittiin dabarsan bira gahuufis hariiroo olee-gadeefi dalgee caasaalee sanaa xiinxaluun barbaachisaa ta“uusaa ibsa. Kaayyoon qoranno kanaa caasaalee afwalaloowwan weedduu yoomessa tika loonii qaaccessuu waan ta“eef yaadiddamota xiinxala afwalaloo jiran keessaa yaadiddamni caasessamaa filatameera. Kana jechuun, caasaa afwalaloowwan weedduu yoomessa tika loonii qaaccessuuf yaadiddamani caasessamaa akka filatamu kan taasise kaayyoo qorannichaati jechuudha. Bu“uruma kanaan qoranno kana keessattis caasaaleen afwalaloo weedduu yoomessa tika loonii Oromoo aanaa Jalduu hariiroo olee-gadiifi dalgee qabaniin ilaalamuu hiikni isaanii xiinxalameera.

Og-afaaniif hiikni garaagaraa kan kennaman yommuu ta“u, dubbiif afaaniitiin yeedaloon kennameefii, yookaan osoo hinkennamiin kalaqaafi ogummaa dhimma hawaasummaa addaa addaa irratti xiyyeffatee aadaa, duudhaa, safuu, seenaa, eenyummaa hawaasaa, walumaagalatti, ogummaafi jirenyaa hawaasa tokkoo ibsuuf humna guddaa qabu ta“uusaa

(Dorsan, 1972) ni ibsa. . Kunis, jirenya hawaasaa keessatti sochii godhamuun bu"aa bahii jirenyaa, mudannoowwan gara garaa, rakkooowwan isaan mudatan bira darbuudhaaf qabsuu godhamu keessa uumamaa kan deemu ta"usaa (Berhanu, 2013) barreesseera.(ስ ሊ ታን , 2007)

ogafaan waggoota dheeraadhaaf beekumsa sammuu dhala namaa keessaa madde yaadachuun namoota birootti himamsa afaaniin, mammaakuun yookan yeedaleessuun ogummaa dhalootaa gara dhalootatti darbaa dhufe ta"usaa ibsa.(Bukenya, 1994)ogafaanogummaa falaasama hawaasaa, aadaa, haala jirenyaa, duudhaa, barsiifata hawaasaa, seenaa, wantoota jirenya keessatti nama muudatanittiin dabarsaniifi beeksisan ta"uu ibsa.

Hiikawan armaan olitti kennaman irraa wanti hubatamu ogafaan haala jirenya hawaasa tokkoo kanibsuumi beekumi hawaasaa akka cimaa deemu kan godhudha. Hawaasni ogafaan isaatiin muuxannoo jiruufi jirenyaa, duudhaa, rakkina jirenya keessatti isa muudate kan ittiin ibsatu ta"uu isaati. Ogafaan duudhaawwan afaaniin dhalootaa dhalootatti daddarban keessaa tokko ta"ee baroota dheeraaf sammuu namootaa keessaa burqee himamufi yoomessa murtaa"e keessatti kan qindaa"ee raawwatudha.

Ogafaan gosa fookloori keessaa tokko ta"ee muuxannoofi mudanno akkasumas qabeenya hawaasaa kan ta"an kanneen akka oduu durii, sheekkoo, eebba, abaarsa, mammaaksa, hibboo, qoosaa, weedduu, sirbaafi kkf of keessatti hammata. Walumaa galatti, ogafaan jechuun hawaasni tokko jiruufi jirenya isaa yeroo dheeraadhaa kaasee afaaniin kan ittiin waliif dabarsaa ture; ammas itti jiru; gara fuula duraas ittiin waliif dabarsudha.

(Okpewho,1992) ogafaan Afrikaa dameewan gurguddoo saditti qooda.Isaanis seeneffamoota afoolaa, walaloo afoolaafi qareeyiidha.Gama biraatiin (Fekade, 1991)n ogafaan bakka lamatti qooda.Isaanis seeneffamoota ogafaaniifi afwalaloodha jedha.(Finnegan,1992)ogafaan dameewan saditti qooddi: kanneen bifa waliin dubbii qaban, kanneen bifa taphaa qabaniifi kanneen bifa asoosamaa qabaniidha jetti. Kanneen bifa waliin dubbii qaban jalatti jechama, mammaaksa, abaarsa, hooda, moggaasafi kkf tarreessiti.Warra bifa taphaa qaban jalatti ammoo, hibboo, dorgaa dorgee, gochaalee ayyaaneffannaa, taphoota hinkaroorfamiiniifi kkf tarreessiti. Warra bifa asoosamaa qaban jalatti ammoo dur durii, sheekkoo, raagamtaa, geerarsa, sirba, weedduufi kkf tarreessiti. (Eshete, 2008)nammo hayyooni fookloori ogafaan bakka gurguddoo shanitti akka goodan barreesseera. Isaanis, ayyaaneffannaa, qareeyyii, walaloo afaanii, seeneffamaa, sirbaafi seenaa afaaniti.

Walumaa galatti, bu"ura qooddi (Fekade1991)tiinogafaan Oromoo hololoofi afwalaloo jedhamuun bakka lamatti qoodama.Ogafaan hololoo gosoota ogafaanii keessaa isa guddaa yeroo ta"u, haala bocaan akka walalotti kan hindhiyaanne kanneen akka oduu durii, sheekkoo, himamsaan dhihaatudha. Qaamolee hololoo jalatti ogafaan ramadamuu danda"anis: oduu durii, hibboowwan, ergaa, dhaamsa, seenaa durii, eebba, abaarsaafaa"i akka ta"an (ስ ሊ ታን ,2007) ibseera. Afwalalojalatti warri ramadaman immoo kanneen bifa walaloo

qaban kanneen akka weedduuwaan aadaa ta"u jechuudha (Asafaa, 2009) afwalaloon afaan saayinsiifi afaan hawaasni guyyuu itti fayyadamurraa adda ta"e kan dubbii haalawaan guutame, kan miira namaa salphumatti kakaasuufi ergaa bal"aa dabarsuun kan qindaa"u ta"uu eera. Afwalaloon bal"inaan kan mul"atu hawaasa barreessuufi dubbisuu hin dandeenye birattii ta"uusaafi Afrikaa keessatti afaaniin daddarbuusaa (Awoonor1975) ibseera. Yaada

hayyuu kanarrraa wanti hubatamu afwalaloon bifa barreeffamaatiin osoo hin taane namoonni sammusaanii keessaa afaañin dhimmoota barbaadanirratti kan jedhan ta“uusaati.

Gosoota afwalaloo ilaachisee yaadonni garaagaraa kan mul“atan yommuu ta“u, dameewwan afwalaloo bal“isuufi dhiphisuun waan baramaadha. Fakkeenyaaaf, (Finnegan,1970)afwalaloo dameewwan addaa addaatti akka qoodamuufi dameewwan afwalaloo Afrikaa, kanamantaa, kan siyaasaa, kan jaalalaa, kan du“aafi kknittti hiramuu akka danda“u eerti. Gama biraatiin (Fekade,1991)afwalaloo afaan Amaaraa qabiyyee isaaniirratti hundaa“uun: kan cidhaa, kan boo“icha, kan kadhaa, kan ukee, faaruu loonii, dhaadannoo, geerarsaa, weedduu tikseefi kkf jechuun qodeera. Ulaagaan qooddi gosoota walalooo afaanii kunis qabiyyeefi akkaataa dhiheenyasaanii ta“uu ibsuun (ስለም, 2007) afwalaloo dameewwan addaa addaatti qodeera.Gama biraatiin (Tashoomaan, 2017)afwalalooOromoo bakka torbatti qoodamuu akka danda“an kaaseera.Yaada hayyooni kunnin kaasanirraa wanti hubatamu hanga ammaatti qoddiin afwalaloo mormisiisaa ta“uusaati. Bu“uruma kanaan qorannoo kana keessattis qoddiwwan kaan caala qoddiin (Fekade,1991)fi(ስለም ,2007) ulaagaa qoddi amansiisaa ta“an waan dhiheessaniifi afwalaloo weedduu yoomessa tika loonii akka qoodama tokkotti waan haammachisaniif dhimma itti bahameera. Qoddiwwan kaan garuu afwalaloo weedduu yoomessa tika loonii qoodama keessaa dhabamsiisaniiru. Kunimmoo ogummaan hawaasaa kun akka dagatamu waan taasisuuf qorattooni kunnin xiyyeffannoosaanii weedduu yoomessa tika looniirratti taasisaniiru.

Afwalaloon weedduu yoomessa tika loonii gosoota afwalaloo Oromoo keessaa tokko ta“ee kan namoonni hojii tika looniirratti bobba“an weeddisaniidha. Afwalaloon weedduu yoomessa tikalonii kunakkuma walaloo barreeffamaa jechoota filatamoo ergaa bal“aa karaa naannawaafi fulleen dabarsan irraa kan qindaa“u ta“uusaa (Tadesse, 2016) ibseera. Yeedaloo miidhagaa miira namaatti toluun kan qophaa“u yommuu ta“u miidhagina yeedaloo sanaa eeguuf sagalee olbaasuufi gadi buusuun sagalee miira namaa hatuu danda“uun bareedee kan weeddifamuudha.

Afwalaloon weedduu yoomessa tika loonii kunis, yeroo garaagaraatti kan weeddifamu yommuu ta“u, yeroo loon gara lafa margaatti bobbaafamanirraa kaasee hanga gara manaatti galanitti tiksee yookan nama hojii tika looniirratti bobba“een weeddifama. (Tadessen, 2016) yaada kana cimsuun yeroo dubbatu, tikseen kan weeddisu, yommuu ganama loon gara bakka dheedichaattii oofaman, guyyaa yommuu tikfamaniifi galgala yommuu gara manaatti deebi“an ta“uusaa ibsa. Haa ta“u malee, tikseen halkan erga loongara mooraatti deebi“aniillee ni weeddisa. Fakkeenyaaaf, ganna ganna yommuu loon fudhatanii bakka margi gahaan jirutti deeman yookan darabaa galan lafuma margaa keessatti mooraa horiifi godoo xiqqoo ijaaruun achuma keessa bulan ni weeddisu.

3. Malleen Qorannichaa

Kaayyoon qorannoo kanaa caasaa weedduu yoomessa tika loonii akka Aanaa jaldutti mul“atan walitti qabuudhaan caasaa isaa xiinxaluudha.Gosoota qorannoo hedduu jiran keessaa kaayyoo qorannoo kanaa akkaataa barbaadamuun milkeessuukan danda“u qorannoo akkamtaa ibsa waan ta“eef, gosni qorannoo kun filatameera. Qorannoon kun madda ragaa tokkoffaatti kan dhimma bahe yommuu ta“u, maddeen kunniniis iddattoowwan hawaasa Oromoo aanaa Jalduti. Qorattooni namoota weedduu tiksee siritti beekan kaayyeffachuun erga filatanii booda namoota weedduu tiksee beekan kan biroo akka eeraniif gaafachuun

mala iddatteessuu darbaa dabarsaatiin hawaasa aanaa Jalduu keessaa iddattoowwan filataniiru.

Qorattoonni iddattoowwan filatamanirraa odeeffanno qabatamaafi barbaachisaa ta“e of-eegganno funaanuuf maloota funaansa ragaa gaaffii afaanifi marii garee xiyyeffataatti dhimma bahaniiru. Gaaffileen afaanii gamisaan caaseffamaa ta“an kan kaayyoo qorannoo kanaa waliin deeman kudha shan (15) qophaa“un iddattoowwan filatamaniif dhihaataniiru. Deebiin iddattoon qorannoo kanaa kennanis waraabduu sagaleefi suursagaleetiin waraabamanii kan funaanaman yommuu ta“u, ragaawwan waraabduu sagaleefi suursagaleetiin waraabaman kana dhaggeeffachuu gara barreffamaatti jijiiramaniiru.

Iddattoowwan filataman keessaa namoota weedduu tikseerratti hubannoo qaban kan baay“inni isaanii torba (7) ta“an beellamaan qunnamuun mariisafamanii odeeffanno irraa funaanameera. Namoonni marii garee kanarratti hirmaatanis ogeessota waajjira aadaafi turiziimii lama(2), maanguddoota lama (2), barsiisota afaanii lama(2)fi dubartii tokko (1) yommuu ta“an, qorattoonni qabxiilee marii kaayyoo qorannichaa milkeessuu danda“an qopheessuun, yaadanno qabachaa mariisisuun odeeffanno barbaachisu walitti qabneerra.

4. Xiinxala Ragaalee

4.1. Caasaalee Walaloo Weedduu Tiksee Loonii

Af-walaloon weedduu tiksee loonii iddattoowwan qorannichaarraa funaanaman qoqqodamanii mala xiinxala ragaa akkamtaatiin ija yaadiddama caasessamatiin xiinxalamuun ibsamaniiru. Sababni malli qaaccessa ragaa akkamtaa filatameef, ragaaleen qorannichaa jechaan kan funaanaman, qaacceffamaniifi jechaan kan ibsamaniifi hiikaman waan ta“eefi.

1. *Osoon tikaan faana xaaruu
Gufuun na dhoofte na dhiigaa
Osoon sumaaf mankaraaruu
Dhufuu na dhoowwan ya diimaa!*

Weedduun armaan olii kun bo“oowwan walaloo afurirraa kan ijaarame yommuu ta“u, tokkoon tokkoon bo“oowwan wallichaa jechoota sadii hanga shanii (3-5) irraa ijaaraman. Bo“oo tokkoffaafi sadaffaan baay“ina jechootaa irraa ijaramaniin kan wal madaalan yommuu ta“an, bo“oo lammaffaafi arfaffanimmoo baay“ina jechootaa irraa ijaaramaniin walgitu. Jechoonni xumura bo“oo tokkoffaafi sadaffaa, kan bo“oo lammaffaafi arfaffaas waan wal isaan fakkeessu qabu. Jechi xumura bo“oo jalqabaarra jiru „xaaruu“ jedhuufi kan xumura bo“oo sadaffaa „mankaraaruu“ jedhu birsaga dhuma qaama „-aaruu“ jedhu waliin qooddatu. Jechoonni dhuma bo“oowwan lammaffaafi arfaffaarratti argaman kan „dhiigaa“ jedhuufi „diimaa“ jedhamanis qaama waliin qooddatan qabu. Kunimmoo hariroo oleefi gadee jechoonni bo“oowwan wallichaa waliin qaban agarsiisa. Hariiroon caasaalee kanneeniis walichi rukuttaa gaariifi unata sagalee akka qabaatu taasisan. Akkasumas, jechoonni bo“oowwan wallichaa keessatti dalga tarreffamanii walicha ijaaran akkaataa waliin deemuu danda“aniin hiriiranii ijaaraman.

2. *Yaa giddiittuu bayyanaa
Dura loon yaasi malee
Ansiin dhiisuu baranaa
Du'a koo taati malee*

Walaloo armaan olii caasaa caasaatti caccabsuun yommuu ilaallu, walaloon kun bo"oowwan afur irraa qindaa"e. Bo"oowwan jalqabaafi sadaffaan jechoota sadi sadirraa, bo"oowwan lammaffaafi arfaffaanimmoo jechoota afurirraa ijaaraman. Baay"ina birsagoota bo"oowwanii yoo ilaalleemmo, bo"oowwan hundinuu birsagoota torbarraa ijaaraman. Haariiroo olee-gadeefi dalgee caasaalee walaloo kanaa yoo ilaalleemmo, bo"oon jalqabaafi sadaffaan jechoota „bayyanaa“ fi „baranaa“ jedhaman kan qaama „-anaa“ jedhamu waliin qabinirraa ijaaraman. Bo"oon lammaffaafi arfaffaanimmoo jecha „malee“ jedhamuun xumuramuun walalichi akka miira hawwatu taasisan. Kunimmoo jechoonni bo"oowwan walaloo sanaa ijaaran kan fullee waliitti argaman qaama walfaakkaatu qabachuun dhumnii bo"oowwan walalichaa rukuttaa akka qabaatu taasisan.

3. *Yaa korma Goobana Daaccii
Sin tiksinee sin obaasee
Kan mormi sooyyama allaattii
Sin jibbinee sin sodaadhee*

Walalooweedduu kanaa caasaalee xixiqqaatti adda babaasuun yoo ilaalle bo"oowwan walaloo kanaa hundinuu birsaga saddeet saddeet akka qaban agarra. Hariiroo caasaaleen kunniin waliin qaban yoo xiinxallemmo caasaaleen „-ii“fi „-ee“ irra deddeebi"anii dhuma bo"oowwaniirratti mul"achuun walaloo kana xumuru. Bo"oowwan walaloo kana ijaaran kan fullee waliitti argaman baay"ina jechootaa irraa ijaaramaniin, baay"ina birsagootaa jechoonni sun irraa ijaraman, caasaaleen birsagaafi gosooni birsagaa isaanii kan wal fakkaataniidha. Kunimmoo walalichi unata gaarii akka qabaatu taasise.

4. *Jiddaa galtamoo gudduudhaha
Roobiikee bineensi nyaatee
Moggaa raftamoo gidduudhaha
Fooliikee qilleensi raasee*

Hariiroo caasaalee weedduu kanaa yoo ilaallummoo, hariiroo dalgeetiin bo"oowwan walaloo armaan olii hundisaanii birsaga saddeet saddeet qabaachuun wal gitu. Hariiroo olee-gadee caasaalee walaloo kanaa yoo ilaalleemmo jechoonni bo"oo tokkoffaafi sadaffaarrar jiran baay"ina jechootaatiin walqixa ta"uurra darbanii dhuma bo"ichaarratti caasaa „-duudhaha“ waliin quoddatu. Jechoonni „Gudduudhaha“ fi „Gidduudhaha“ jedhan kan bo"oo tokkoffaafi sadaffaarratti argamanimmoo garaagarummaa yookan jijiirama dhamsaga tokkootiin jijiirama hiikaa fidan. Gudduun maqaa gabaa fardeen itti gurguramtu kan Salaale keessatti argamu yommuu ta"u, gidduun immoo bakka faallaa qarqaraa ta"a. Garaagarummaan hiikaa kunis akka mul"atu kan taasisan dhamsagoota lama /i/ fi /u/ dha. Bo"oo lammaffaafi arfaffaanis caasaa „-ee' dhaan xumuruun wal fakkaatu.

5. *Yaa ilmaan turumbulle
Fooqii jala yaatanii
Eessaa fidda yaa bubbee
Foolii nama yaadanii*

Walaloo weedduu armaan olii kana caasaan ijaaran jechoota, birsagootafi dhamsagoota yommuu ta"an hariiroo caasaaleen kunniin qaban haa ilaallu. Bo"oowwan walaloo armaan olii hundinuu birsaga torba torbarraa kan ijaaraman yommuu ta"an, baay"ina birsagaatiin walgituun caasaalee walaloo kanaa walalichi hawwataafi kan yedaloo qabaatu taasisa. Hariiroo jechoonni oliifi gadii qaban yoo ilaalleemmo jechoonni wal gararraa jiran garaagarummaa dhamsaga tokkootiin jijiirama hiikaa akka fidaniifi caasaa waliinii akka

qaban hubanna. Fakkeenyaaaf, bo^{oo} lammaffaa keessatti jecha „*fooqii*“ jedhuufi bo^{oo} dhumaan keessatti jecha „*foolii*“ jedhu fudhannee yoo ilaalle, jechoonni lamaan garaagarummaa dhamsagoota lamaan /q/ fi /l/ malee qaama „*-oolii*“ jedhu waliin qabu. Akkasumas jechoonni „*yaatanii*“fi „*yaadanii*“ jedhaman qaama „*yaa-anii*“ jedhu waliin qabaatanis dhamsagni /t/fi /d/ bakka wal jijiiruun qaamni yookaan caasaan sun hiika garaagaraa akka qabaatu taasisan.

6. *Yaa sangoota Yaadatee*
Lafeen qilxibii muluu
Har’ammo na yaadatee
Akkamiin rafee buluu?

Caasaalee walaloo kanaa yoo ilaalle, walalichi bo^{oo}owwan afurirraa kan ijaarame ta^{ee}, tokkoon tokkoon bo^{oo}owwan walaloo hundi jechoota sadi sadirraa ijaaraman. Kana malees baayⁱⁿⁿⁱ birsagaa bo^{oo}owwan hundaattu torba torba. Baayⁱⁿⁿⁱ jechootaafi birsagoota bo^{oo}owwan hundaa walfakkachuu hariiroo dalgee caasaaleen kun qaban yommuu ta^u, hariiroon olee-gadee caasaalee walaloo kanaa immoo jechoonni bo^{oo}owwan xumuran sagaloota wal fakkatuun xumuramuun isaaniiti. Fakkeenyaaaf walaloo armaan olii keessatti bo^{oo} tokkoffaafi sadaffaan sagalootaan wal fakkaachuurra darbuun jecha tokkoon xumuramu. Jechi kunis „*Yaadatee*“ yommuu ta^u irra deddeebi^{uun} dhufuun jecha kanaa miidhagina yookaan hawwattummaa walalichaafi miidhagina yeedaloo weedduu sanaa olkaaseera. Jechi „*Yaadatee*“ jedhu kan bo^{oo} tokkoffaafi sadaffaa keessatti irra deddeebiin mul^{ate} kun unka tokko qabaatulle bo^{oo}owwan lamaan keessatti hiika addaa addaa lama bakka bu^a. Bo^{oo} tokkoffaa keessatti „*Yaadatee*“ kan jedhu maqaa namaan kan bakka bu^u yommuu ta^u, bo^{oo} sadaffaa keessatti garuu „*Yaadatee*“ kan jedhu waan kanaan dura sammuu keessa deddeebi^{uun} rakkisu wayii ammas itti deebi^{uusaa} bakka bu^a. Jechi kun haala galumsa isaatiin jijiirama hiika fideera jechuudha.

Walaloodhuma weedduu armaan olii keessatti bo^{oo} lammaffaifi bo^{oo} arfaffaan jechoota, „*Muluu*“fi „*buluu*“ jedhaniin kan xumuraman yommuu ta^u, hariiroon olee-gadee jechoota yookan caasaalee kanaa qaama „*-uluu*“ waliin qabaachuun dhamsagoota /m/fi /b/ wal jala jijiiruun garaagarummaa hiikaa fidaniiru. Garaagarummaan hiikaa mul^{ate} kunis jijiirama dhamsagoota lamaaniin dhufeedha.

7. *Yaa abbaakoo hin rafinii*
Jaarsi dulloome hin rafuu
Maa argaan kee hin hafinii
Gaafan si yaade hin rafuu

Walaloo kana ija yaadiddama casessummaatiin yommuu ilaallu, walaloowwan weedduu kanaa bo^{oo}owwan afuriifi tokkoon tokkoon bo^{oo}owwanii birsagoota saddeet saddeet irraa ijaaramuu isaanii hariiroo dalgee caasaalee kanaati. Hariiroo olee-gadee caasaalee walaloo kanaa yoo ilaalleemmo walaloon weedduu kanaa jechoota ijoo irra deddeebisuun fayyadamu. Fakkeenyaaaf, bo^{oo}on tokkoffaafi sadaffaan walaloo armaan olii jechoota „*rafanii*“fi „*hafanii*“ jedhaman kan qaama „*-afinii*“ jedhu waliin quoddataniin xumuramu. Jechoonni kun qaama „*-afanii*“ jedhu waliin quoddachuuun dhuma bo^{oo}owwaniirratti hiriiruun walalichi rukuttaa akka qabaatu taasisani. Bo^{oo}owwan lammaffaifi arfaffaa keessatti jechi „*hin rafuu*“ jedhu irra deddeebi^{uun} mul^{achuun} dhimma ijoo yookan rakkoo hirriibaa namfakiin walaloo sanaa qabu nu hubachiisa.

8. *Roobi roobi yaa gannaa*
Taltallee waraabbannaa
Boo'i boo'i yaa garaa
Takkallee walyaadannaa

Walaloonkun bo“oowwan afurirraa kan ijaarame yommuu ta“u, bo“oowwan lamaan jalqabaa haala tibba gannaa kan calaqqisiisan yommuu ta“u, bo“oowwan lamaan dhumaan immoo miira keessoo tikseen loonii qabu ibsu. Gabaabumatti, tikseen loonii haalota addaa addaa mul“atanitti qabachuun miira keessoo isaa ibsata jechuudha. Weedlyun kun tikseen sun nama yaade sana waliin dabarsuuf yaadaan dhama“usaa mul“isa. Bo“oowwan arfan walaloo weedlyukanaa birsagoota torba torbarraa kan ijaaraman ta“anii caasaaleefi gosooni birsaga bo“oowwan tokkoffaa kan bo“oo sadaffaa waliin, kan bo“oo lammaffaa immoo kan bo“oo arfaaffaa waliin wal simu. Fakkeenyaaaf, bo“oon jalqabaa “*Roobi roobi yaa gannaa*” jedhuufi bo“oo sadaffaa “*Boo'i boo'i yaa garaa*” jedhu caasaalee birsagaa wal fakkaatu qabu. Akkasumas bo“oon lammaffaa “*Taltallee waraabbannaa*” jedhuufi bo“oon arfaaffaa “*Takkallee walyaadannaa*” jedhu caasaalee birsagaa wal fakkaturraa ijaaraman. Dabalataanis jechoonni dhuma bo“oowwaniirratti wal fakkaachuufi dhamsagoota tokkoon xumuramuun hariiroo olee-gadee caasaalee kanaatin walalichi rukuttaa akka horatu taasisan.

9. *Nan bobbaasaa nan galchaa*
Dalasaa somboorrattii
Nan bobboo'aa nan gaddaa
Dhalabbaa tokkoorratti

Walaloon kun akkuma walaloowwan kanaa olitti ilaalle hundaa bo“oowwan afurirraa kan ijaarame ta“ee, Baay“inni birsagaa jechoota bo“oowwan walaloo arfaniituu saddeet saddeet ta“uun dheerinni bo“oowwan walalichaa akka wal madaaluufi qusanna jechootaa akka qabaatu taasiseera. Jechoonni dhuma dhuma bo“oowwaniirratti wal fakkaachuunimmoo walalichi yeedaloo akka horatu taasiseera. Fakkeenyaaaf bo“oo tokkoffaafi sadaffaan jechoota „*galchaa*“ jedhuufi „*gaddaa*“ dhamsagoota „*-aa*“ dhaan xumuramuunifi bo“oon lammaffaaifi arfaffaanimmoo jechoota „*somboorrattii*“ jedhuufi „*tokkoorrattii*“ jedhan qaama „*-oorratti*“ jedhu waliin quoddachuu hariiroo olee gadee akka qaban mul“isaniiru. Jechoonni bo“oowwan walaloo kanaa kan dhuma bo“oowwaniirratti mul“atan dhamjechoota waliin quoddatanirratti dhamsagoota garaagararaa muraasaa wal jijiiruun garaagarummaa hiikaa fidu.

10. *Salaale yaa lafa yaayyaa*
Saani maseene dhaluufii
Nagaatti yaa intala aayyaa
Andarabaatti galuufi

Walaloon weedlyu armaan olii kun bo“oowwan afurirraa kan ijaarame yommuu ta“u, baay“inni birsaga bo“oowwanimmoo saddeet saddeetidha. Hariiroo jechoonni walaloo kanaa waliin qaban yoo ilaalleemmo jechoonni dhuma bo“oowwanii dhamsagoota wal fakkaatuun xumuramuun yookan dhamsagoota hedduu waliin qabaachuusaaniti. Caasaan walalichi irraa ijaarame qaamolee hedduu waliin quoddachuu kunimmoo walalichi wal unata sagalee akka qabaatu taasise. Jecha dhuma bo“oo tokkoffaafi sadaffaa akkasumas bo“oo lammaffaaifi arfaaffaa yommuu dubbifaman yookan sagaleeffaman kan wal unatan yookan walfakkaataniidha. Jijiiramuun, dabalamuufi hir“achuu dhamsaga tokkoon jijiirama hiikaa fidu. Bo“oo tokkoffaa keessatti jechi „*yaayyaa*“ jedhuufi bo“oo sadaffaa keessatti jechi „*aayyaa*“ jedhu dabalamuufi hir“achuu dhamsaga tokkoo „*y“tiin* garaagarummaa hiikaa fidan.

11. Abbaa jidda abbaa kaloo

Ogeessa gindii tolchuu

Akkam jirta yaa intaloo

Odeessan dubbii hin tolchuu

Jechoonni bo“oowwan walaloo weedduu armaan olii qindeessuuf filatamanis dhamsagoota hedduu waliin kan qabaniifi hariiroo qabaachuusaanii agarra. Fakkeenyaaaf jechi bo“oo jalqabaa keessatti „*kaloo*“ jedhuufi jechi bo“oo sadaffaa keesssatti „*intaloo*“ jedhu qaama „-*alo*“ jedhu kan waliin qaban yommuu ta“u, jechi „*tolchuu*“ jedhu bo“oo lammaffaafi arfaffaa keessatti deddeebi“ee dhufuun, akkasumas bo“oodhuma lammaffaafi arfaffaa keessatti jechoonni „*ogeessa*“fi „*odeessa*“ jedhaman kan dhamsagoota „*o-eessa*‘ waliin qaban mul“achuun hariiroo oleefi gadee caasaalee walaloo weedduu kanaa mul“isu. Jechi tokkichi „*tolchuu*“ jedhu kun caasaa kana keessatti bakka garaagarraa galuun hiika addaa addaa lama kenne. Bo“oo lammaffaafi keessatti hiika „*bocuu*“ jedhu kan qabaatu yommuu ta“u, bo“oo arfaffaa keessattimmo hiika „*balleessuu*“ jedhu dabarsa. Garaagarummaan hiikaa caasaa kanaa kan dhufe bakka garaagarraa galuu jecha sanaatiin akka ta“e hubanna.

12. Haati meetii intala dhaantee

Ishiin talbaa gurgurraanii

Ani keetii na wallaaltee

Biyya ormaa bubbullaanii

Bo“oowwan walaloo armaan olii hundisaaniituu baay“ina birsagaa saddeet irraa kan ijaaraman yommuu ta“an, jechoonni walaloo kanaas dhamsagoota walfaakkatan waliin quoddachuuun hariiroo uumanii. Bo“oo tokkoffaa keessatti gaaleen “*Haati meetii*” jedhuufi bo“oo sadaffaa keessatti gaaleen “*Ani keetii*” jedhan dhamsagoota „-*eeti*“ jedhaman waliin qabaachuun garaagarummaa dhamsagoota lamaa /m/fi /k/tiin hiika maqaa namaafi bamaqaa abbummaa horataniiru. Kanaafuu garaagarummaan hiikaa lamaan kun garaagarummaa yookan walijijiiruu dhamsagoota lamaaniin kan uumameedha jechuudha. Dabalataanis bo“oowanuma kana keessatti jechoonni „*dhaantee*“fi „*wallaaltee*“ jedhaman birsaga „-*tee*“ waliin qabaachuun, bo“oo lammaffaafi arfaffaa keessattimmo jechoonni „*gurgurraanii*“ fi „*bubbullaanii*“ jedhaman dhamsagoota „-*aani*“ waliin quoddachuuun hariiroo cimaa qabaachuusaaniitiin caasaan walalichaa dhumarratti rukuttaa akka qabaatu taasisani.

13. Gabaabaa muka xilaadhaa

Buchi saree gaana deemtuu

Shafaafaa luka filaadhaa

Faccifatteen baasa himbeektuu

Caasaa walaloo weedduu armaan olii yoo ilaalle, akkuma walaloowwan kaanii bo“oowwan afurirraa kan ijaarame yommuu ta“u, tokkoon tokkoon bo“oowwan walalichaa birsagoota saddeet saddeet kan qabaniifi jechoonni bo“oowwan walaloo kanaa irraa qindaa“an dhamsagoota walfakkaatan hedduu kan qabaniifi hariiroo cimaa kan qabaniidha. Walaloo armaan olii bo“oo tokkooffaa keessatti jechi „*gabaabaa*“ jedhuufi bo“oo sadaffaa keessatti jechi „*shafaafaa*“ jedhu, bo“oodhuma tokkoffaa keessatti jechi „*muka*“jedhuufi bo“oo sadaffaa keessatti jechi „*luka*“ jedhu, jechi „*xilaadhaa*“jedhuufi „*filaadhaa*“ jedhu dhamsagoota walfakkaatan hedduufi dhamsagoota muraasa jijjiirrachuun jechoota garaagarummaa hiikaa uumaniidha. Akkasumas, bo“oo lammaffaafi arfaffaa walalichaa keessatti jechoonni, „*deemtui*“fi „*beektuu*“ jedhan jechoota dhamsagoota hedduu waliin quoddatan ta“uurra darbanii caasaa birsagaafi gosoota birsagaa yookan sanyiwwan

birsagnisaanillee wal fakkaatu.Fakkeenyaaf jechoota birasagatti qoqqooduun caasaalee
birsgootafi gosoota birsgoota isaanii haa ilaallu.

Jechoota Hariiroo qaban	Baay'ina birsgaa	Caasaabirsagaa	Gosa birsagaa
Muka Luka	Mu-ka Lu-ka	df-dt+df-dt df-dt+df-dt	BBL fi BBL BBL fi BBL
Xilaa Filaa	Xi-laa Fi-laa	df-dt+df-dt-dt df-dt+df-dt-dt	BBL , BBJ BBL,BBJ
Shafaafaa Gabaabaa	Sha-faa-faa Ga-baa-baa	Df-dt+df-dt-dt+df-dt Df-dt+df-dt-dt+df-dt	BBL,BBL,BBJ,BBJ BBL,BBL,BBJ,BBJ
Deemtuu Beektuu	Deem-tuu Beek-tuu	Df-dt-dt-df+df-dt-dt Df-dt-dt-df+df-dt-dt	BCJ, BJB BCJ, BJB

Gabatee1: Gabatee Hariiroo caasaalee jechoota walaloo agarsiisu

Furtuu: -df = dubbifamaa dt = dubbachiiftuu BBL =Birsaga banaa laafaa

-BBJ =Birsaga banaa jabaa -BCJ= Birsaga cufaa jaba

Akkuma gabatee armaan oliirraa hubachuun danda“amu, jechoonni bo“oowwan walaloo keessatti fulleewan waliitti dhufan baay“ina birsagaatiin kan wal gitan, caasaalee birsagaafi gosoota birsagaa wal fakkaataa kan qaban ta“uusaaniti. Kunimmoo hariiroo caasaaleen sun qaban agarsiisa.

14. *Okkote gaafa farsoo*
Gaaniin gaafa dhaabani
Foqosee gaafa rakkoo
Gaariin gaafa yaadanii

Walaloo kana caasaa inni ittiin ijaarameen yoo ilaallu qindaa“ina jechootaa bo“oowwan afurii kan baay“inni birsaga bo“oo tokkoo birsaga torba ta“eeni. Jechoonni bo“oowwan walaloo kana keessatti argamanis kallattii dalgaafi olee-gadeetiin hariiroo cimaa kan qaban yommuu ta“u, akka fakkeenyatti jechoonni bo“oo tokkoffaa walalichaa keessatti argaman jechoota bo“oo sadaffaa walalichaa waliin hariiroo qabaachuu isaanii agarra. Kunis, jechoonni bo“oowwan lamaanii dhamsagoota hedduu waliin quoddachuuusaaniiti. Akkasumas, jechoonni bo“oo lammaffaa fi bo“oo arfaffaas hariiroon isaan waliin qaban qaama tokko (dhamsagoota) waliin qabaachuu isaaniiti. Jechoonni dhamsagoota baay“ee waliin qaban kunis, jechoota akka „okkote“fi „foqosee“, „farsoo“fi „rakkoo“, „gaaniin“ fi „dhaabani“ „yaadanii“ dha. Jechi „gaaniin“ jedhu kan jalqaba bo“oo lammaffaa walalichaarratti argamuufi jechi „gaariin“ jedhu kan jalqaba bo“oo arfaffaarratti argamu qaama „gaa-iin“ jedhu kan waliin qaban yommuu ta“an garaagarummaa dhamsaga tokkoo qofa qabu. Garaagarummaan dhamsaga tokkoo kunimmoo garaagarummaa hiikaa uume.

15. *Yaa maxaaxee goggogaa*
Yaa iddi baala hin qabnee
Yaa asmaaree dhommoqaa
Kan gatii baasa hin qabnee

Caasaa walaloon kun irraa qindaa“eefi hariiroo caasaalee kanneenii yoo ilaalleemoo walalichi bo“oowwan afurirraa ijaarame. Bo“oowwan jalqabaafi sadaffaan walaloo kanaa birsagoota torba torba irraa kan ijaaraman yommuu ta“u, bo“oowwan lammaffaaafi arfaffaanimmoo birsagoota saddeet saddetirraa ijaaraman. Hariiroo jechoonni walaloo kanaa qaban yoo ilaalleemoo jechoonni kallattii waliirratti argaman baay“ina birsagaa, caasaa birsagaafi gosoota birsagaatiin wal fakkaatu. Walfakteenyi caasaa kanneenimmoo walalichi yommuu yeedaleeffamu yookan weeddifamu yeedaloo gaariin kan unata qabu akka uumamu taasisa.

16. *Turaa damee loon hin eeguu*
Jirtaa yaa Turaa Dameekoo
Kuraamalee fuulli seeequu
Jirtaa yaa guraamalee koo

Caasaa walaloo weedduu armaan olii yoo ilaalleemoo, walalichi bo“oowwan afur kan tokkoon tokkoon bo“oowanii birsagoota saddeet qabanirraa caaseffame. Birsagooni jechoota kanaas caasaa birsagaa wal fakkaatu, baay“ina birsagaa walqixa, sanyiwwan birsagaa wal fakkaatan yookan kan walitti dhihaatan qabaachuu hariiroo uumanii dhimma barbaadamu sanaaf oolan. Hariiroon jechoonni walalicha ijaaran waliin qaban kunimmoo walalichi caasaa miidhagaafi yommuu dubbifamu rukuttaa gaarii qabu akka ta“u taasise.

17. *Kulkuluu yaalmaan allaattii*
Kormaan bataskaana seenee
Ururuu akkalmoo dhabaattii
Mudhin kan Leenca maseenee

Walaloo kana caasaaleetti caccabsinee yoo ilaalleemoo walaloon kun bo“oowwan afur qaba. Tokoon tokkoon bo“oowanii birsagoota baay“inni isaanii, caasaan isaaniifi sanyiin isaanii wal

fakkaataa ta“e yookan walitti dhihaaturraa ijaaraman. Haalli kunimmoo, walaloon weedduu sanaa yeedaloo miidhagaafi hawwataa akka qabaatu taasiseera.

18. Abooterraan Jimma buutee

*Daadhii kibbiitti dhibaasuu
Kan gofareen dheeda guutee
Baacaa giddiitti ijibbaatuu*

Walaloo kana keessatti jechoonni walalicha qindeessuuf tarree galan hariiroo cimaa qabu. Hariiroon jechoota walaloo kanaas dalgeen yoo ilaalamu akkaataa caasaa hima afaan Oromoo eeguun kan qindaa“aniifi hiknisaanii caasaalee kanneen walitti fiduun kan argamu ta“uudha. Hariiroo olee-gadee jechoota kanneenii yoo ilaalleemmo jechoonni fuullee waliitti argaman baay“ina birsagaatiin kan wal gitan, caasaalee birsagaa walfakkaataa kan qabaniifi sanyiwwan birsagaa walfakkaataarraa kan ijaaramaniidha. Qindaa“inno birsagootaa jechoota uumuun, qindaa“inni jechootaammo gaalee uumuun dhaamsa wallisaan barbaadu sana daabarsu jechuudha. Jechoonni fuullee waliitti tarreeffaman kan hariiroo waliin qaban kunis dhuma bo“oo tokkoffaarratti kan argamu jecha „buutee“ jedhuufi dhuma bo“oo sadaffaarratti kan argamu jecha „guutee“ jedhu yoo ilaalle jechoonni kun qaama „-uutee“ jedhu kan waliin qooddataniifi bakka wal jijiiruu dhamsagoota /b/fi /g/tiin jijiirama hiikaa kan fidaniidha. Kunimmoo walalichi miidhagina akka qabaatuu yeedaloo akka horatu taasisa.

19. Yaa kaleessa yaa guyyaa

*Re‘een baala nyaachisaa
Yaa bareedduu akka durbaa
Sumaaf na watwaachisaa*

Walaloo kana yaadiddama caasessummaatiin yoo xiinxallu, caasaaleen walaloon kun irraa ijaarame bo“oowan afur kan gaaleewwan garaagaraa qaban, kan jechoota garaagaraa qaban, jechoonni gaalee sanaas birsaga addaa addaatti qoqqoodamuu kan danda“an ta“uu agarra. Hariiroo caasaalee xixiqqoo walaloo kanaa yommuu xiinxallummo baay“inni birsagoota jechoota bo“oowanii kan wal madaalu ta“uu, caasaan birsaga jechoota bo“oowanii kan wal fakkaatu ta“uufi sanyiwwan birsaga jechootaa bo“oowanii walitti dhihaachuu yookan wal fakkaachuu agarra. Akkasumas, jechoonni fuullee waliitti argaman dhamsagoota baay“ee kan waliin qaban ta“unsaaniimmoo miidhagina walalichaa akka olkaasefi hawwataa taasisuusaa hubanna.

20. Ijaaraniituma diiguu

*Xaafin kan abbaa qoteetii
Ilaalaniituma dhiisuu
Gaariin kan abbaa horeetii*

Walaloon kun bo“oowan afur kan jechoota baay“ina birsagaan, caasaa birsagaafi sanyii birsagaa walfakkaataa qabanirraa ijaarame yommuu ta“u, caasaaleen walaloon kun irraa ijaarames hariiroo addaa addaa qabu. Hariiroo jechoonni bo“oo walaloo armaan olii waliin qaban keessaa muraasa yoo ilaalle jechoonni fuullee waliitti argaman dhamsagoota baay“ee waliin qabu. Dhamsagoota baay“ee waliin qabaachuu isaaniimmoo walalichi miidhagee unata qabaatee ergaa tikseen loonii ittiin dabarfachuu barbaade sana dabarsuu danda“eera.

Walleen tiksee looniiakkuma haala diinagdee waliigalaa ibsuuf wallifamu, haala diinagdee nama dhuunfaa ibsuufis ni wallifama. Fakkeenyaaaf tikseen loonii tokko nama jaalatu sana garaa laaffifachuuf akka armaan gadiitti wallisuu danda“a.

21. *Yaa laanqisaa baala ceekaa**Kun obboleessa mukaati**Na laaffisaa maalan beeka**Kun obboleessa du'aati*

Walaloon kun bo“oowwan afurirraa ijaarame; bo“oon tokkoffaan bo“oo sadaffaa waliin, bo“oon lammafaan immoo bo“oo arfaffaa waliin hariiroo cimaa qabu. Hariiroon bo“oowwan kanaas bo“oo tokkoffaafi sadaffaan baay“ina jechoota walqixa qabu. Akkasumas, baay“inni birsagaa, caasaan birsagaafi sanyiin birsagaa jechoota bo“oo tokkoffaafi sadaffaa wal fakkaatu. Kan bo“oo lammafaafi arfaffaas akkasuma. Haalli kunimmoo yaadiddama caasesummaa keessatti hariiroo caasaaleen sun qabaniidha. Caasaaleen walalichaa hariiroo akkasii qabaachuun ergaa walaloo sanaa akka baataniif gargaara. Kana jechuun osoo qaamoleen kunniin hariiroo tokkollee qabaachuun baatanii miidhaginni kun hin jiraatu. Weedduu dhamdhama gaarii qabu kan namni hedduun dhagahuu fedhu ta“uun hafeet haasaadhuma idilee ta“a. Kanaaf tikseen loonii weedduu kana qindeessuun jechoota caasaaleen wal fakkaatan filachuun yeedaloo itti uumanii dhimma barbaadanifoolfatu jechuudha.

Hariiroo jechoonni walaloo kana keessaa waliin qaban akka fakkeenyatti fudhannee yoo ilaalle, jechi bo“oo tokkoffaa keessatti “*laanqisaa*” jedhuufi jechi bo“oo sadaffaa keessatti „*laaffisaa*“ jedhu qaama „*laa—isaa*“ jedhamu waliin qabu. Bo“oowanuma kana keessatti jechoonni „*baala*“ fi „*maala*“, „*ceekaa*“ fi „*beekaa*“ jedhan garaagarummaa dhamsaga tokkoo qofaan hiika addaa addaa qabaatan. Caasaaleen kunniin garaagarummaa hiikaa uumanillee, dhikkisaafi unata gaarii qabaachuun isaanii dhama buusaa walaloo armaan olii bareechanii jiru.

22. *Shumburaa qarqara caakkaa**Haadha Beenyaa fardi dhiitee**Hundumaaf harsama raaftaa**Naan jennaanan si dhiisee*

Bu“uura yaadiddama caasessamaatiin walaloon weedduuwwan armaan olii bo“oowwan afur kan jechoota baay“ina birsagaa, caasaa birsagaafi sanyii birsagaatiin walitti dhihaatanirraa ijaarame. Jechoonni walaloon kun irraa qindaa“es hariiroo cimaa kan qaban yommuu ta“u hariiroo jechoonni kunniin waliin qabanis dhamsagoota baay“ee waliin quoddachuudha. Fakkeenyaaaf jechoota bo“oo lammafaafi arfaffaa walalichaa keessatti argaman „*dhiitee*“ fi „*dhiisee*“ yoo ilaalle jechoonni kun garaagarummaa dhamsaga tokkootiin hiika addaa addaa lama lukaan rukute kan jedhuufi jibbe kan jedhu horatan malee qaamoleen jechoota kanaa kan hafan wal fakkaatu. Kunimmoo , walalichi dhumarratti sagalee walfakkaatuun xumuramuunyeedaloo akka qabaatu taasiseera.

23. *Ariirtu gubbaan Irreensaa**DuubniGoorgisii gorbaatii**Eessanan dhufee silaalaa**Ansilaa tiksee ormaatii*

Weedduu kana akkaataa yaadiddama caasessamaatiin yoo ilaallu, akkuma weedduuwwan biroo buufanni walalichaa bo“oowwan afurirraa kan ijaarame yommuu ta“u, baay“inni birsagoota tokkoon tokkoon bo“oowwan walaloo immoo saddeet saddeet ta“uifi caasaalee walfakkaatu qabaachuusaanii agarra. Fakkeenyaaaf jechi xumura bo“oo lammaaffaarratti argamu kan „gorbaatii“ jedhuufi jechi dhuma bo“oo arfaffaarratti argamu kan „ormaatii“ jedhu qaama „or-aatii“ jedhu kan waliin qaban ta“ee garaagarummaa dhamsagoota /b/fi /m/tiin jechichi hiika garaagaraa lama akka qabaatu taasisan.Jechoonni bo“oowwan walaloo kanaa qaama jechaa

baay”ee waliin qabaachuuniifi garaagarummaa dhamsagoota lamaatiin garaagarumma hiikaa fidas walalichi unata akka qabaatu taasisa.

24. Ijaara dhahii darpii

*Qilxuu jalan loon tiksaa
Ijaan na dhahii darpii
Kichuu dhaqna soogiddaa*

Bo“oowwan lamaan jalqabaa walaloo kanaa bakka tika loonii kan himaniidha. “*Ijaara dhahii*” jechuun mooraa loon keessa bulan yommuu ta“u, “*qilxuu jalan loon tiksaa*” kan jedhummoo bakka mucaan sun loon tiks u ibsu. Bo“oowwan sadaffaafi arfaffaanimmoo bifaa baramaa hin taaneen waa“ee miidhagina qaama shamarranii dingisiiifatu. Haa ta“u malee, xiyyeffannoona keenya hariiroo jechoonni walaloo kanaa waliin qaban waan ta“eef, jechoonni bo“oowwan walaloo kanaa kannen akka “*ijsaara*”fi “*ijsaan*”, “*qilxuu*”fi “*kichuu*” jedhan qaama jechaa waliin qooddatan yookan wal isaan fakkeessan qabu. Jechi akka “*darpii*” jedhummoo, irra deddeebi“ee dhufuudhaan rukuttaa bo“oowwan walalichaa cimse. Kun hariiroo caasaaleen weedduu kanaa waliin qabaniidha.

25. Abbaan amantee garbaa

*Amanteen garba mitii
Ammaa nagattee galtaa
Amantee qabda mitii*

Weedduun armaan olii kun tikseedhaan kan weeddifamu yommuu ta“u, akkuma walaloosaarrraa arguun danda“amu, namni weedduu kana weedisu nama hiriyaasaarrraa shakkii qabuudha. Shakkiin nama kanaas namni inni jaalatu sun amanamummaa akka hin qabneefi dhiisee deemuu akka danda“u ibsa. Kanaafuu, weedduun tiksee kun shakkii namoonni walirraa qaban ibsuuf kan oolu yommuu ta“u, shakkii kun kan kutaa sammuu riphaa keessatti ukkaamfamee tureedha. shakkii kana ibsuufimmoo jechoota baay”ina birsagaatiin walgitan, jechoota caasaalee birsagaa walfakkaatu qabaniifi jechoota sanyiin birsaga isaanii tokko ta“erraajaa ijaaraman. Jechoonni kunis hariiroon isaan waliin qaban qaama jechaa yookan dhamsagoota hedduu kan waliin qabaniidha. Jechoota hariiroo waliin qaban kanneen weedduu armaan olii keessa jiran yoo ilaalle, jecha „*abbaa*”fi „*ammaa*”, „*amantee*”fi „*nagattee*” kan jedhan yommuu ta“an, jechoonni akka „*mitii*”fi „*amantee*” immoo irra deddeebi“uudhaan mul“ataniiru. Jechi „*amantee*” jedhu kun bo“oowwan walalichaa keessatti bakka addaa addaatti irra deddeebi“uun bakka galumsaa irratti hundaa“uun hiika addaa addaa argateera.

26. Hidhabuun boora qalee

*Laaftoo mureen dalasaa
Sidhaabuun boo'a malee
Gaariin bulee dhalataa*

Ergaan weedduu kanaa filannoona biraa kan caalu jiraachuu ibsuu yommuu ta“u, namni waan sammunsa itti miidhame akka dhokfatu yookan haalu ogeessonni yaadiddama xiinsammuu bu“uuressan ibsaniiru. Bu“uuruma kanaan weeddisaan kun nama kanaan dura jaalate dhabuusaatiin akka miidhame ukkaamsee dhoksudhaan filannoo san caalu akka qabu ibsa. “*Sidhaabuun boo'a malee*” yommuu jedhu akka waan ishiidhaaf gaddee fakkeessa. Haa ta“u malee, Namasana dhabuusaatiin akka miidhame weedduu kanarraa ni mul“ata.

Jechoonni walaloo kanaa caasaa birsagaa wal fakkaatu, sanyiwwan birsagaa walfakkaatuufi baay”ina birsagaa walqixa kan qaban yommuu ta“u, hariiroo jechoonni waliin qaban yommuu ilaallummoo, jechi bo“oo tokkoffaa kan „*Hidhabuun*” jedhu jecha bo“oosadaffaa kan „*sidhaabuun*” jedhu waliin, jechi bo“oo tokkoffaa „*boora*” jedhu jecha bo“oo sadaffaa „*boo'a*” jedhu waliin,

jechi bo“oo tokkoffaa kan „*qalee*“ jedhu jecha bo“oo sadaffaa kan „*malee*“ jedhu waliin, jechi bo“oo lammaffaa kan „*muree*“ jedhu kan bo“oo arfaffaa „*bulee*“ jedhu waliin, kan bo“oo lammaffaa „*dalasaa*“ jedhu kan bo“oo arfaffaa „*dhalataa*“ jedhu waliin qaamolee baay“ee kan waliin qabaniifi hariiroo cimaa qabaachuusaanii agarra. Hariiroon jechoonni kun waliin qabanis baay“ina birsaga irraa ijaaraman, gosoota birsaga irraa ijaaramaniin walfakkaachuudha. Kunimmoo walalichi miidhaginaafi rukuttaa gaarii akka qabaatu taasisseera.

27. *Yaa boora gabaa jimaataa*
Farda malee hin yaaphu gaangee
Nan boo'a galaa ijaabbataa
Har'a malee hin kaasu waankee

Namni weedduu kana weeddisu nama gara fuulduraatti waa“ee nama weeddifamuuf kanaa yaaduu hin barbaadne akka ta“e hubachuun ni danda“ama. Kunis namni weeddifamuuf sun akka namni weeddisu sun barbaadu ta“uu waan dideef ta“a. Weeddisaan kun kana booda waa“ee nama weeddisuuf kana yoo kaase miidhamuu akka danda“u yaaduun dhimma kana dhoksee yookan ukkaamsee kaa“uu barbaada. Haala kanammoo jechoota walfakkaatan kanneen baay“ina birsagaatiin, caasaa birsagaafi sanyii birsagaatiin walitti dhihaatanitti fayyadamuun ibsate. Jechoonni hariiroo waliin qaban kunis, „*boora*“fi „*boo'a*“, „*gabaa*“fi „*galaa*“, „*jimaataa*“fi „*ijibbaata*“, „*gaangee*“fi „*waankee*“ warra jedhaniidha. Jechoonni bo“oowwan walaloo armaan olii ijaaran hariiroo armaan olii qabaachuunsanii walalichi unata sagalee akka qabaatuuf gumaachaniiru.

28. *Qotin qonnaa lafa daargee*
Qonneet falaxaa dhadhaabnaa
Sobi hin sobnaa yaa magaallee
Sobneet alagaa fakkaannaa

Caasaa walaloo armaan olii yoo ilaalle walalichi bo“oowwan afurirraa ijaarame. Bo“oowwan walalichaas birsagoota saddeet saddeet irraa kan ijaaraman yommuu ta“u, jechoonni bo“oowwan walalichaa irraa qindaa“an jechoota dhamsagoota wal fakkaatan waliin qabaniidha. Keessaattu bo“oon tokkoffaan bo“oo sadaffaa waliin, bo“oon lammaffaanimmo bo“oo arfaffaa waliin birsagoota wal fakkaataniin xumuramuun yeedaloo walalichaa uumaniiru. Walaloo weedduu armaan olii keessatti jechoota hariiroo waliin qaban muraasa fudhannee yoo ilaalle jechi bo“oo tokkoffaa keessatti jecha „*qonnaa*“ jedhuufi bo“oo sadaffaa keessatti „*sobnaa*“ kan jedhan qaama „*-nnaa*“ jedhu kan waliin qaban yommuu ta“u, jechi bo“oo jalqabaarratti „*dhadhaabnaa*“ jedhuufi bo“oo arfaffaa „*fakkaannaa*“ jedhan hariiroo cimaa waliin qabu. Hariiroon isaaniis dhamsagoota baay“ee waliin quoddachuu isaaniti.

Walumaagalatti qaaccessa walaloowwan armaan oliirraa akkuma hubachuun danda“amutti walaloowwan weedduu tiksee loonii hundi bo“oowwan afurirraa kan ijaaraman ta“anii gaaleewwan yookan jechoonni bo“oowwan tokkoffaafi sadaffaa kan bo“oowwan lammaffaafi arfaffaa hariiroo cimaa waliin qabu. Hariiroowwan jechoonniifi gaaleewwan bo“oowwan walaloo weedduuwwan tika loonii armaan olii kunis baay“ina jechoota irraa ijaaramaniin walqixa ta“uu yookan walitti dhihaachuu, baay“inni birsagootaa jechoonni irraa ijaaramaniifi gosooni birsagootaa jechoonni irraa ijaaramanii tokko ta“uifi walfakkaachuun walalichi rukuttaa akka qabaatu taasisaniiru.

4.2 Haala Weedduun Tiksee Yeroo Ammaa Keessa Jiru

Haala weedduun tiksee yeroo ammaa irra jiru iddattoowwan hawaasa Oromoo aanaa Jalduu keessaa afgaaffiintaasifameeffi marii gareetiin deebiin kennan akka mul“isutti, yeroo ammaa

hawaasa Oromoo aanaa Jalduu biratti weedduun tiksee guutumaan guututtillee yoo ta“uu baate laafeera. Kunis tikseen yeroo ammaa kan hin weeddifne ta“uifi maanguddoonti muraasni darbanii darbanii haala ijoollummamaa isaanii yaadachuuf kan weeddisan akka ta“e ragaan ni agarsiisa. Haalli kun immoo weedduun tikseedhalootuma kanaan dura ture qofa biratti akka hafe mul“isa. Weedduun tiksee looniikun haala dur ittiin beekamuufi weeddifamuu weeddifamuu dhiisuun kun weedduun tiksee yeroo ammaa baduuf sadarkaa yaaddessaarra jiraachuuusaa hubachiisa.

Sababootni addaa addaa weedduun tiksee akka laafuufi dagatamu taasisan keessaa inni ijoon dhiibbaa amantiiti. Namoonni hordoftoota amantii kiristaanaa Ortodoksiifi Pirotestaantii ta“an yeroo loon tiksaa maal akka sirban gaafataman faarfannaa amantii isaanii akka farfaatan ibsan. Namoonni amantii Pirotestaantii hordofan amantichi guutumaan guututti sirba akka hin eeyyamne kan himan yommuu ta“u, hordoftoonni amantii Ortodoksi garuu, dur akka sirban himuun yeroo dhihoo as finxalessummaa (extremism) mul“achaa dhufeen akkuma amantii Pirotestaantii faarfannaa amantichaa faarfachuu malee sirbi akka hin eeyyamnamneef himaniiru. Tikseewan amantii kiristaanaa hordofan hundinuu bakka loon tiksantti faarfannaa amantii isaanii faarfatu malee hin weeddisan. Kanaafuu, namoonni hordoftoota amantii Kiristaanummaa ta“an hammuma dabalan weedduun tiksee hir“achaa deema jechaadha.

Dargaggooni afgaaffiin taasifameef weedduu tiksee weeddisuu akka qaana“an himan. Weedduun aadaa duriyyeroo ammaa qaanessaakka ta“es himaniiru. Yeroo loon tiksaa maal akka weeddisan gaafatamaniis deebiin isaanii sirboota ammayyaa miidiyaalee garaa garaa irraa dhagahan akka ta“e ibsan. Sirboonni ammayyaa guyyaa guyyaadhaan akkuma baay“achaa bulan fedhiifi qalbii tiksee waan hawwataniif tikseen weedduu dagachuudhaan sirboota ammayyaa meeshaalee muuziqaa ammayyaatiin qindaa“an akka sirban ragaaleen iddattoo hawaasa Oromoo aanaa Jalduurraa funaanaman ni agarsiisu. Kanaafuu, sababoota weedduu tiksee laaffisan keessaa innitokko dhiibbaa ammayyummaati jechuudha.

Weedduuwan tikseen yeroo garaagaraatti weeddisu karaa fuulles ta“u karaa naannawaadhaan siyaasa biyyatti yookan haala bulchiinsa naannoo murtaa“aa tokkoo qeequu danda“a. Yeroo kanammoo qaamni bulchiinsa naannichaa nama weedduu sana weeddis adabuun, hidhuufi reebuu akka danda“u namoonni odeeffanno kennan ibsaniiru. Kana malees, sababa haalli siyaasaa biyya keenyaa haalota kana hin eeyyamneef dhaabbileen sabqunnamtii mootummaas ta“ee dhuunfaa weedduu kana beeksisuuf wanti hojjatan akka hin jirre idattoowwan hawaasa Oromoo aanaa Jalduu ibsaniiru. Kanaafuu, tikseeniis haalota kana jalaa bahuuf weedduurraa of qusachaa akka jiran ragaan funaaname ni mul“isa. Walumaa galatti haalli siyaasa biyya kanaa weedduun yoomessa tika loonii akkaataa barbaadamuu beekkamtii argatee akka hin guddanneef dhiibbaa mataasaa taasiseera.

Qorattooni yeroo gaaffii afaanii adeemsiisaa turanitti ijoollen loon tiksaa hedduun bilbilaa harkaa (mobile phone) akka qabaniifi sirboota ammayyaa miimooriiru irratti feesifachuun akka dhaggeeffatan namoonni odeeffanno kennan ibsaniiru. Babal“achuun meeshaalee teekinoolojii keessattuu bilbila harkaa tikseen weedduu weeddisuu dhiisuun sirboota mana muuziqaaatti maxxanfaman akka dhaggeeffatan taasiseera. Kunimmoo, weedduun tiksee akka dagatamu yookan akka laafu taasiseera. Kanaafuu, sababoota weedduu tikseerraan dhiibbaa hamaa geessisaa jiraniifi weedduun tiksee akka laafu taasisan keessaa dhiibbaan teekinoolojii isa tokko ta“uusaa bu“aan qorannoo kanaa ni agarsiisa.

Sababni laafinsa weedduu tiksee loonii inni biraan jijiiramuu haala jirenya hawaasaati. Namoonni odeeffannoo kennan akka himanitti baay "inni ummataa dabala deemuun fedhiin loon horsiisuu yookan qabeenya horachuus dabala deema. Baay "inni namoota loon horsiisanii yoo dabalemmoo, qabeenyi uumamaa kan akka lafa margaa murtaa "aa waan ta "eef wal hanqachuu eegala. Lafti kanaan dura margaaf oolu gara lafa qonnaatti geeddaram. Lafti margaa yommuu wal hanqatummoo namoonni baay "ina loon horsiisanii ni hir "isu. Loon xiqlaannaan immoo tikseen loon waliin deemuun hafeet bakkuma murtaa "atti hidhuun dhufe. Haalli kunimmoo tikseen loon fageesee tiksun weedduu akka hin weedisne taasise. Kanaafuu, lafti margaa bal "inaan jiraachuu dhiisuun weedduun tiksee akka duriitti bal "inaan akka hin weeddifamneefi akka laafuu dhiibbaa mataasaa uumeera jechuudha.

4.3. Hiree Weedduu Tiksee Gara Fuulduraa

Hireen weedduu tiksee kan gara fuulduraas yaaddoo hamaa keessa jiraachuuusaa ragaa namoota odeeffannoo kennaniifi bu "aa xiinxala hojii qorannoo kanaarraa hubatameera. Akka maanguddooni jedhanitti, maanguddoota muraasarraan kan hafe yeroo ammaa namni weeddisu hin jiru. Kunimmoo weedduun tiksee gara fuulduraatti dhaloota waliin fulla "uu kan hin dandeenye ta "uusaa mirkaneessa.

5 Cuunfaa

Weedduun tiksee loonii hawaasa Oromoo aanaa Jalduu biratti beekkamaa turullee, yeroo ammaa kana laafuu sadarkaa dagatamuurra gahaa jira. Bu "uuruma kanaan beekumsi hawaasaa kan dhimmoota jirenya dhuunfaas ta "ee jirenya hawaasummaa ibsuu keessatti gahee olaanaa qabu kun akka hin dagatamneef barreffamatti jijiiruuf, qoranno kun walaloo weedduu tiksee hawaasa Oromoo Aanaa Jalduu xiinxaluun dhiheesseera. Bu "uuruma kanaan:

- Walaloon weedduu tiksee caasaa dhaabbataa kan qabu yommuu ta "u, caasaaleen dhaabbataan weedduu tiksee kunis: Walaloon weedduu tiksee tokko bo "oowwan afurirraa kan ijaaramu ta "uu, bo "oowwan tokkoffaafi sadaffaan baay "ina birsagootaan yommuu walgitan bo "oowwan lammaffaafi arfaffaan baay "ina birsagaatiin kan wal gitan ta "uun hubatameera.
- Sanyiwwan birsagaafi caasaan birsagaa walaloo weedduu tiksees kan bo "oo jalqabaafi bo "oo sadaffaa kan wal siman yommuu ta "u, kan bo "oo lammaffaafi arfaffaa walsimuun qoranno kanaan bira gahameera. Jechoonni dhuma bo "oo tokkoffaafi sadaffaa, akkasumas kan bo "oo lammaffaafi arfaffaa yeroo hunda birsaga dhuma waliin quoddachuufi yeroo baay "ee dhamsagoota hedduu waliin qabaachuun bira gahameera. Jechoonni ergaa ijoo baatan bo "oowwan walaloo keessatti irra deddeebi "uun mul "achuunsaaniis qoranno kanaan bira gahameera.
- Malli ijaaramaa yookan caaseffamni qaamoleen bo "oowwan walaloo weedduu tiksee loonii walsimuun kunis walalichi safara akka qabaatuufi unata sagalee horachuun yeedaloo barbaadamu uumuuf gahee olaanaa kan taphatu ta "uunsa hubatameera.
- Yeroo qoranno kun adeemsifametti sadarkaa weedduun tiksee irra jiru yoo ilaalleemoo, weedduun tiksee laafuurra darbee sadarkaa dagatamuurra gahuusaati. Sababoota weedduun tiksee akka laafuufi dagatamaa deemu taasisan keessaa warren ijoon dhiibbaa amantii, dhiibbaa ammayyummaa, dhiibbaa guddina teekinoolojii, dhiibbaa siyaasaafi dhiphachuu lafa margati. Haalli kun itti fufnaan hireen awfalaloo

weedduu tiksee kan gara fuulduraa dhabamuu yookan baduu ta"uusaa xinxalli qorannoo kanaa ni mul"isa.

5. Yaboo

Weedduunyoomessa tika looniikun yeeroo ammaa laafaa dhufuurra darbee sadarkaa dagatamuurra gahuunsa haalaan nama yaaddessa. Weedduun yoomessa tika looniikun dhama eenyummaatiin kan guutame waan ta"eef weedduun dhama eenyummaatiin guutame kun dagatamuun mallattoon eenyummaa akka dagatamu yookan badu taasisa. Kanumarraa ka"un weedduu yoomessa tika loonii badiirraa oolchuuf tarkaanfiwwanarmaan gadii osoo fudhatamanii gaarii ta"a.

- Hawaasni Oromoo aanaa Jalduu weedduu dhama eenyummaasaaniin guutame kana akkuma duriitti osoo weedisani gaaridha.
- Dhaabbileen sab-qunnamtii mootummaas ta"ee kan dhuunfaa kanneen akka OBS, OBN, OMN, ONN, FBCfi EBC, weedduu tikseerratti sagantaa bashannanaa qopheessuun osoo beeksisanii gaarii ta"a.
- Waajirri Aadaafi Turiziimii Aanaa Jalduu weedduu tikseerratti qorannoo bal"aa adeemsiisuun ragaa barreffamaa gahaa dhalootaaf osoo kaa"ee gaaridha.
- Qorattooni Afanii, Seena, Aada, Xiin-sammuufi Fookiloorii weedduu tikseetiif xiyyeffannoo kennuun akkaataa dirree qorannoosaaniin walitti dhufuu qorannoo gadi fagoo osoo irratti adeemsisanii.
- Weellistoonni Oromoo weedduu tiksee akkuma jirutti hojjachuun hawaasaaf osoo dhiheessanii.
- Barreessitoonni Oromoo weedduu tikseerratti barreffama garaagaraa qopheessuun osoo beeksisanii.
- Ogeessonni sirna barnootaa qopheessaan weedduu yoomessa tika loonii qabiyyee barnoota Afan Oromoo keessatti haammachiisuun dhaloonti weedduu tikseerratti hubannoo akka argatuuosoo taasisanii.
- Ogeessonni Fiilmii Afan Oromoo weedduu tikseerratti Fiilmii Dookumentarii qopheessuun miidiyaaleerratti agarsiisanii weedduu tiksee osoo beeksisanii.
- Dhaabbileen miti-mootummaa dhimma beekumsa hawaasaarrattihojjatan qorannoowwan weedduu yoomessa tika looniirratti adeemsifaman osoo jajjabeessanii gaarii ta"a.

Wabiilee

AsafaaTafarraa (2009). *Eela:Seenaa Oguma Oromoo*. Finfinnee: Far East Trading PLC.

Bartis, P. (2002). *Folklife and Field Work: An Introduction to Field Thecniques*. Washington Dc: Publications of the American Folklife Center, no. 3.

Bascom, W. (1965). The Forms of Folklore: Prose Narratives. *Journal of American Folklore* , 3-20.

BerhanuMateos (2013). *Fundamentals of Literature*. Addis Ababa: Alpha Printers PLC.

Bukenya, A. (1994). *Understanding Oral Literature*. Nairobi: Nairobi University Press.

- Bronner, Simon J. (2012). *Practice Theory in Folklore and Folklife Studies*. Folklore 123: 23–47.
- Creswell, J. W. (2009). *RESEARCH DESIGN: Qualitative, Quantitative, and Mixed Methods Approaches*. United States of America: SAGE Publications, Inc.
- Dorson, R. (1972). *Folklore and Folk Life: An Introduction*. Chicago and London: The University of Chicago Press.
- Dundes, A. (1976). *Projection in Folklore: A plea for psychoanalytic*. Logan, Utah: Modern Language Notes.
- Eshete, G. (2008). African Egalitarian Values and Indigenous Genres: The Functional and Contextual studies of Oromo Oral Literature in Contemporary Perspectives (Phd Dissertation). *Institut for Litteratur, Kultur og Medier*.
- Fekade Azeze. (1984). *Ethiopian oral literature: A preliminary Review and Bibliography. Paper delivered at the international conference of Ethiopian studies (8th : (1984. Addis Ababa: Addis Ababa university.*
- Fekade Azeze. (1991). *Yesinaqal Mamriya*. Adiis Ababa: Bole Printing Enterprise.
- Finnegan, R. (1970). *Oral Literature in Africa*. Oxford: Clarendon Press.
- Finnegan, R. (1992). *Oral Traditions and The Verbal Art: A guide to Research Practices*. Newyork: Francis e-Library.
- Okpewho, I. (1992). *African Oral Literature*. Bloomington and Indianapolis: Indiana University Press.
- Sims and Stephen. (2005). *Living Folklore: An introduction to study of people on their traditions*. Longanutah University press.
- Sumner, C. (1997). *Oromo Wisdom Literature Vol.II: Songs: Collection and Analysis*. Addis Ababa: AAU Publisher.
- Short, Mick. (1996). *Exploring the Language of Poems, Plays, and Prose*. London: Longman.
- Tadesse, J. (2016). Oral poetry as herding tool: a study of cattle songs as children's art and cultural exercise among the Guji-Oromo in Ethiopia. *Journal of African Cultural Studies*, <http://dx.doi.org/10.1080/13696815.2016.1201653>
- Tashoomaa, E. (2017). *Ogafaan Oromoo: Hidhaa Barnootaa sagantaa Digirii Lammafaaf Qophaa'e*. Ambo, Oromiyaa.
- Tyson, L. (2006). *critical theory today: A User-Friendly Guide, 2nd edition*. New York London: Taylor & Francis Group.
- ሰለምንተሻመ:: (2007):: ፈከለር:: መንበትናየጥቃቅኩማሚ. አዲስ አበባ: ቁር አስተኛ ትራክናንግ PLC::
- ቅቅል ቅለሳ:: (2008):: የከርምና እጣኬ እውነትና የዘር መንፈብ. አዲስ አበባ:ነበረን እምሮ ተከልል::